

四庫全書

史部

欽定四庫全書

史部

世宗憲皇帝上諭旗務議覆卷六五

詳校官左都御史_臣李綬

編修_臣袁謙覆勘

總校官知縣_臣楊懋珩

校對官助教_臣卜維吉

謄錄監生_臣魏淳耀

欽定四庫全書

世宗憲皇帝上諭旗務議覆卷五

上諭三月十八日為

皇考聖祖仁皇帝萬壽聖節舊例於是日虔誠齋肅禁止屠

宰今應永遠遵行

至聖先師孔子師表萬世查八月二十七日為

聖誕之期亦應虔肅致敬朕惟

君師功德恩被億載普天率土尊親之戴永永不忘而於

誕日尤當加謹以展恪恭思慕之忱非以佛誕為比擬也著
內閣九卿會同確議具奏特諭

內閣九卿等議覆作君作師功德並隆於兩大致愛
致懋尊親勿間於千秋我

皇上繼志述事重道尊師一切禮儀靡不備舉茲以

聖祖仁皇帝

至聖先師孔子

君師恩德歷萬世而不誼恭逢

誕日尤當加謹令臣等會同確議具奏仰見

皇上孝敬肫篤有加無已之至意臣等欽惟

聖祖仁皇帝極作君作師之盛兼治統道統之全深仁厚澤
涵濡六十餘年普天率土謳吟思慕之誠千萬年當
如一日查舊例於三月十八日恭遇

聖祖仁皇帝萬壽聖節虔誠齋肅禁止屠宰今應欽遵

聖諭每年三月十八日仍照舊例内外文武各官以及軍
民人等虔誠齋戒不理刑名禁止屠宰永遠遵行

至聖先師孔子道集大成師表萬世詩書遺澤霑被無窮
至聖誕降之期允宜齋心滌慮共致恪恭嗣後每年八月
二十七日恭值

至聖誕辰内外文武各官以及軍民人等亦應致齋一日
不理刑名禁止屠宰永為定例如此庶四海臣民共
展忱悃尊親之戴永永不忘億萬斯年咸知

聖祖仁皇帝建君師之極配天地而無疆

孔子立道學之宗偕河山而同壽矣俟

命下之日通行在京各衙門及八旗奉天直隸各省一體遵行可也

奏入於雍正五年二月二十日奉

旨是依議

上諭八旗都統副都統及叅領等朕將兩淮鹽課羨餘銀每旗賞給一千兩其滿洲蒙古漢軍之叅領多寡不同將賞給三旗銀三千兩即於三旗內合算應給都統若干副都統若干叅領若干之處著管理旗務王大臣等

議奏特諭

管理旗務王大臣等議覆八旗都統副都統叅領等
荷蒙

皇上隆恩每旗賞給養廉銀一千兩又以三旗叅領多寡
不同

特命臣等集議務使一體均霑臣等欽遵

上諭謹將滿洲蒙古漢軍三旗均勻計算都統等每人二
百四十兩副都統每人一百七十兩叅領十二員竝

旨
管理察哈爾之叅領一員每人六十兩副叅領十二員每人四十兩又查鑲黃正黃正藍此三旗蒙古之察哈爾叅領係本處人原食半俸居住察哈爾地方應不給與此三旗各餘銀六十兩併大臣內有兼職者餘出銀兩俟歲底時令其聲明情由及在何處交納之處另行請

奏入於雍正五年二月二十七日奉

旨所議好其餘剩銀兩著於該旗中公收貯遇有應行賞賜之處再行賞給

上諭佐領等竝無協同辦事之人若佐領遇有他故不獲辦事該都統輒隨意委人署理與其隨意委署不若每佐領額設副佐領一員令其協同佐領辦事既可互察弊端而事件亦不致於遺誤補授之時將大臣官員以及驍騎校等視其人材可用力能管轄者令其兼理庶於事有裨益著八旗都統議奏特諭

八旗都統等議覆佐領一官實司一佐領之事職分最為緊要但只佐領一人於事不無遺悞且佐領遇有事故係該都統暫委一人署理未必實心行走如各佐領下添設副佐領一員令其協同辦事互相稽察於佐領下事務實屬大有裨益臣等欽遵

上諭將旗下之大臣官員及部院官員護軍校驍騎校內人去得能管轄者每缺揀選一人帶領引

見補授此所放之副佐領行走三年如果稱職照佐領例

給與紀錄外遇有公中佐領及副叅領缺出帶領引見補授倘有不能辦理佐領事務者亦照佐領之例治罪
俟

命下之日一體遵行

奏入於雍正五年三月二十三日奉

旨依議

上諭聞得火班處俱拴馬匹滿洲蒙古旗下皆有官馬漢軍旗下並無官馬因而僱馬備用將滿洲蒙古旗下之

官馬作何酌量分給漢軍旗下拴養之處著八旗大臣等議奏特諭

八旗大臣等議覆漢軍八旗竝無官馬火班處所拴馬匹實係兵丁僱用我

皇上洞悉其故

特命臣等集議

睿慮周詳無微不照臣等欽遵

上諭議得漢軍八旗火班處各拴馬三匹激桶處各拴馬

三匹每日兩處共需用馬六匹嗣後相應令漢軍八旗各拴官馬十二匹分為兩班於火班及激桶處輪流當差備用此官馬十二匹酌量於滿洲旗下分出九匹蒙古旗下分出三匹給與漢軍旗下令其拴養如此則兵丁等無僱用馬匹之累矣

奏入於雍正五年三月二十三日奉

旨依議

上諭著順承郡王錫保公訥圖阿布蘭帶領太監孔進等

往問允祓所行魘勝之事太監孔進等據實首出朕因將伊等之罪俱行寬免允祓係重犯在圈禁處復為魘勝之事伊將實情供出朕或寬宥倘有一言支飾捏供定行正法特諭

順承郡王錫保等奏稱臣等遵

旨帶領太監孔進往問允祓魘勝之事據允祓供稱私結阿其那塞思黑等以圖大事是實原係護衛二海雅圖勸我入阿其那塞思黑之黨以為後日之地我以

阿其那塞思黑允禪等之黨援甚多威勢強盛且與太監魏珠李坤等相結甚深而外人又皆保薦阿其那欲為後日之地是以忘死入於伊等之黨塞思黑允禪事奉阿其那如同君上凡阿其那所言伊等無不順從雖死不辭阿其那塞思黑允禪等誓同生死之言伊等俱已向我告知伊三人內塞思黑看待我好而允禪與阿其那二人尤為親密一日我問塞思黑允禪後日孰可得大位塞思黑云此大位必是八阿

哥得耳諸大臣又皆稱揚伊好斷不能出伊之手再
我與塞思黑允禔同向阿其那云爾乃我等之主後
日須憐看我等阿其那閉一目而笑阿其那見人務
為謙恭而内存異志

聖祖仁皇帝升遐時若不將允禔遣往軍前斷不能如此安
靜後將允禔自軍前調回伊在

景山東門舉動大露叛逆之狀係衆人所共知者塞思
黑以允禔在軍前不遂伊等之意因而寄我書內云

機會已失悔之無及凡此皆係實事等語臣等又問
允祓再將爾等密商要事盡行供出據允祓供稱我
雖入伊三人之黨伊等並不以我為人凡緊要之事
俱不令知曉是實等語臣等又問允祓爾太監所首
府內焚燒表疏所用係是何符據允祓供稱此符係
我屬下馬甲雅賴請來宣府之蕭姓道士因治我之
病請神符內有此一符等語查允祓阿其那塞思黑
允禔互相結黨擾亂

國家大姦大惡種種重罪顯然畢露曾經諸王大臣叅奏將阿其那塞思黑允祇允禔應即正法以彰國典皇上不忍將伊等即行正法而阿其那塞思黑罪惡貫盈相繼俱伏冥誅允祇允禔係暫令禁錮以待其悛改之人今允祇於禁錮處又行魔勝之事全不知感戴皇上深恩改悔惡行滅絕法紀妄亂已極斷為

國法所不容宥請將二海雅圖臣等會同刑部嚴審治罪另行奏聞外允祇照大逆律即行正法伊之子孫

俱令為民撤去黃帶以為不忠不義大姦大惡者之
戒

奏入於雍正五年四月十二日奉

旨允祇生性貪污昏昧為阿其那塞思黑所欺誘聽其指
使朕恐其在外妄行致獲重罪故將伊禁錮以保全之
伊在禁錮之處仍敢行魘勝之事經伊太監供首伊亦
自認不諱又將從前與阿其那等共為不法之事亦皆
首出本應將伊即行正法但此等庸劣不堪之人不能

為國家之患著免其正法仍舊禁錮

八旗都統等奉

上諭看來八旗兵丁凡該班之處俱係買飯而食多需盤費殊覺拮据如令二人互相換班而食令該班之人食後進班則盤費可省徒步往返又可習勞將此徧諭兵丁如謂換班食飯於伊等有益爾等與前鋒統領護軍統領等公同議奏特諭

八旗都統前鋒統領護軍統領等議覆臣等欽遵

上諭徧行詢問兵丁人等僉稱

皇上廩念兵丁當差行走買飯而食多需盤費特降

諭旨皆令飯後進班實於我等大有裨益等語臣等伏思
聖主愛養兵丁無不備至又以該班人等盤費拮据令其
更換行走

睿慮周詳無微不至臣等議得嗣後一應該班之人俱令
在家飯後辰時進班其換班之人亦令飯後於申時
更換如此則盤費可省而於兵丁大有裨益矣

奏入於雍正五年五月初七日奉

旨王大臣等將兵丁身體勞苦之處不必姑息伊等費用錢財之處甚宜留心兵丁等當差行走是其專務理應教之服習勞苦勤於公事斷無教以奢靡妄費之理從前兵丁等怠於當差給坐地虎等銀錢代為該班自身得以乘間妄行再護軍等差役未經均派之前或有佐領多之王等門下護軍看守之處甚少竟有月餘不進班者即偶遇該班其家計稍裕者又給人銀錢令其代

往且同係護軍受人銀錢僱賃與人代為該班亦甚屬卑鄙無恥之事大臣等留心教訓兵丁使之務實耐勞甚為緊要既係兵丁乃欲圖安逸不耐勞苦費用錢財不知愛惜此乃甚惡之習所關甚鉅爾等將此不時開導訓諭

王大臣等奉

上諭朕昨日閱前鋒等射箭觀覽之下殊嫌朕意今日閱護軍等射箭亦不下於伊等朕深嘉悅將護軍馬甲等

令八旗都統護軍統領副都統護軍叅領驍騎叅領等
每人或一百名或五十名或二三十名各行分定教習
俟教習一年或半年之後朕將伊等所教之人召來驗
看果好朕自有恩賜如或不好將伊等治罪其實心教
習與不實心教習者朕自得知爾等將兵丁照常訓練
外其如何分派數目教習之處爾八旗大臣會同護軍
統領議奏特諭

八旗都統護軍統領等議覆兵丁人等騎射最為緊

要

皇上特降諭旨令大臣官員將兵丁分行教習立法實為
盡善臣等欽遵

上諭議得滿洲旗下正副叅領共十員每人各派馬甲三
十名令其教習叅領等所教之馬甲三百名令該旗
都統副都統等總理教習蒙古漢軍亦俱照此例行
再八旗護軍統領每人各派護軍校護軍三十二名
護軍叅領副叅領每人各派十八名分令教習著該

旗護軍統領司鑰及其次辦事章京等總理教習俟
至一年之後奏

聞恭候

皇上躬閱

奏入於雍正五年五月二十九日奉

旨依議

大學士等奉

上諭朕所交事件甚多諸大臣因何不行覆奏若所交之

事不可施行應將不可施行之處聲明具奏倘不能辦理應將事件呈送朕前朕代諸臣辦理况朕竟日坐勤政殿又不憚暑熱欲辦理事務竟無事辦諸大臣如此因循遲延不奏其意將誰諉乎著交與內閣將朕特旨交與各該處一切事件俱查明具奏凡朕特旨所交之事竝揀選引見人員非內閣轉交即奏事人等轉交嗣後奉特旨所交一切事務竝揀選引見人員等事每月將已結未結之處著該處聲明情由交送內閣內閣於

月底彙奏特諭

大學士等議奏臣等欽遵

上諭行文各部院衙門著將一應

特旨所交併揀選引

見人員事件其已結未結之處每月聲明情由作速送到
本衙門於月底彙題外查內務府衙門八旗都統衙
門步軍統領衙門俱有

特旨所交併揀選引

見人員事件內務府衙門所辦事件俱係

內廷之事又另設有御史不時稽察應仍交該御史令其稽察其步軍統領衙門所辦之事與別衙門不同仍交步軍統領令其酌量辦理奏

聞再八旗每月派有一旗之都統副都統等當月一應特旨所交併揀選引

見人員事件皆係當月之大臣等所悉知者其已結未結之處即交當月之都統副都統等詳查奏

聞如此則各處俱有專司既易於稽察而事件亦不致有遲誤矣

奏入於雍正五年六月初十日奉

旨步軍統領衙門事件亦著派滿漢御史各一員稽察餘依議

正黃旗蒙古都統等請將私放印子銀之賈富成及該佐領驍騎校領催等交部治罪奉

上諭部務甚多此事不必交部爾該旗即行辦理今兵丁

等喜喪之事俱有恩賞銀兩儘可治辦完備乃仍賣錢糧米石借用印子銀若不將此追出徒令其徼幸耳將賣錢糧米石及借印子銀人之已還未還本利銀兩悉令追出賞給拏獲之官兵嗣後如有買人錢糧米石及放印子銀者一經拏獲即照此例賞給拏獲之人再如七八人同賣錢糧米石借用印子銀其中若有一人首出將伊等所借已還未還銀兩悉令追出賞給遵旨實首之人佐領驍騎校係承辦佐領事務之員乃於該佐

領內之事不能稽察相應革退將賣錢糧米石及借放印子銀人等如何治罪之處一併定議具奏特諭

正黃旗蒙古都統等議覆兵丁買賣錢糧米石及以重利借放印子轉子銀兩之事業已屢經禁止而贖身之賈富成違禁取利情殊可惡應將賈富成枷號三個月鞭一百條贖身之人不必給還原主應將伊妻子一同發往烏龍江與披甲人為奴佐領驍騎校係專管該佐領內事務之人該佐領查喇封阿等既

不能管束又不能查出甚屬溺職應將佐領查喇封
阿等驍騎校六十五等俱革職其具保之署驍騎校
三達子領催存住等俱鞭一百革退其違禁賣錢糧
米石及借印子轉子銀之副護軍校二格親軍桑格
護軍張五領催黃苟馬甲來住步兵二哥等俱鞭八
十將伊等所賣錢糧米石銀兩及所借印子轉子已
還未還之本利銀兩一併追出分為二分除拏獲此
案人犯之叅領西爾他副叅領西拉爾泰係該管官

不議外其精奇尼哈番拜思胡朗給與一分領催長
保住馬甲巴牙爾圖等給與一分再賈富成係護軍
他晉泰之家人該佐領喇塞驍騎校常明將賈富成
贖身混於旗民之處不能查出亦屬不合應將喇塞
常明俱降一級罰俸一年領催六十五及他晉泰明
知其情乃令贖身稽查之時又不首出應將六十五
鞭一百革退將他晉泰鞭一百
奏入於雍正五年七月初十日奉

旨依議

八旗都統等奉

上諭旗人內有犯枷責之罪革職退甲而無產業者間住
京師依附親戚度日以致良善之人為其所累而伊等
無事閒居不無妄行為非之處將此等人查明令其於
京師附近直隸地方耕種井田相應如何安置爾等會
議具奏特諭

八旗都統等議覆我

皇上廩念旗人生計令獲罪革退之人耕種井田以為衣食之資既可免其閒居為非又不至累其親戚

聖諭周詳實為至當臣等請將八旗滿洲蒙古內犯枷責罪革退之官兵等查明併其妻子發往井田著各旗造冊交與管理井田之人令其管束不許擅來京師伊等之子若有長成能騎射者准該管之人保送該旗照常挑甲此發往之人若有生事為非者照依所犯加倍治罪每戶給地三十畝五戶共給牛三隻其

置買耕具穀種等項併半年口糧每戶給銀十五兩
令該管之人酌量地方蓋造土房給與居住再旗下
開戶家人內有犯枷號鞭責之罪退甲者亦應發往
與實心耕種井田之人令為壯丁

奏入於雍正五年七月二十四日奉

旨此事依議但井田地方止有塞德等管理著於彼處添
設驍騎校四員領催八名令在伊等之下辦理事務其
俸餉陞轉之處俱照京城驍騎校領催之例以為伊等

陞進之階若有已經陞轉仍願在彼効力者即以陞銜照常留彼將此二年內在彼處行走勤慎人去得應放驍騎校者著保送到部引見補授

上諭議政大臣九卿各部院衙門八旗將應奏事件遲延者甚多從來寬定期限者特為難辦之事應待行查有需時日故耳今見三兩日內可以完結之易事亦謂尚未及限怠慢推諉置之不辦及至屆期始行具奏與原定限期之意實屬相違凡事應隨到隨即辦理完結乃

將易辦之事稽遲時日此不過從中作弊以為請託之地而已毫無裨益著議政大臣九卿將易於辦理事務作何另定期限之處詳悉議奏特諭

議政大臣九卿等議覆查各部院衙門八旗所辦事件每多任意遲延及限期將滿之時始行辦理完結殊屬不合臣等欽遵

上諭嗣後除兩衙門會稿八旗會議事件仍照定限完結外其一應不待查核易於辦理之事如吏禮兵刑工

等衙門向例二十日完結者今擬定十日完結戶部
向例三十日完結者今擬定二十日完結其八旗及
當月旗所辦易結事件俱擬定十日完結至議政及
九卿會議事件向無定限嗣後如有行查事件定限
三十日完結不須行查易辦之事限十日完結倘仍
有怠慢遲延互相推諉以致違限未結者應令內閣
科道查出糾叅照例議處再兩衙門會稿雖有定限
但止有主稿衙門逾限處分之例而會稿衙門往往

任意遲延嗣後會稿移咨之處定限十日送回如逾限不行送回著主稿衙門即知會科道等題叅

奏入於雍正五年七月二十七日奉

旨依議

上諭旗下寡婦年少無子併無近族者勉強令其守節似非善事官員兵丁亡故之後不論其妻之歲數皆予以俸祿錢糧其中年少之人欲改嫁者反處於兩難以致誤其終身於滿洲等之顏面大有關礙理宜論其歲數

至若干歲以上方准其守節如有堅欲守節者令其族中及佐領下人等公同具保准令守節之處著八旗大臣等會同詳議具奏特諭

八旗大臣等議覆查八旗相沿之例官員兵丁亡故之後無論寡婦之歲數及有無子嗣但憑該叅領佐領驍騎校領催族長等具保係官員之妻給與半俸一年係兵丁之妻給與半分錢糧一年年少寡婦既無子嗣又無近族徒因戀此俸祿錢糧不令改嫁實

非善事且於旗人之顏面甚有關礙嗣後請將官員
兵丁之寡婦若有子嗣或年至四十及有養贍之人
者仍令叅領佐領處具保俾得一年之半俸錢糧米
石外其年未至四十又無子嗣及近族者不准給與
若此內有實係情願守節及有養贍之人者令其族
人及其母家同該佐領等具保呈明該管大臣奏

聞之後照例給與一年之半俸錢糧令其守節如此則年
少寡婦既不至誤其終身而守節之婦亦得以表見

矣

奏入於雍正五年九月十七日奉

旨依議

上諭八旗一應獲罪人犯俱送刑部監禁監內人多氣味穢惡一感時氣多成災病旗人與民人不同民人犯法完結之日即回原籍無所用處若旗人罪案完結之後仍供各項差役並非棄置不用之人也所以治其罪者特欲其知所懲戒以改不肖之行耳乃旗人一罹罪戾

即成廢人殊覺可惜况監內災病既多而其中所拘禁者又皆惡亂姦險之重罪人犯將旗人與民人一處拘禁豈有善言相告不但不能悔改祇益習於為惡而已甚無益也著將八旗現審之罪人及審明情實之死罪人犯照常刑部監禁外其審結定罪人等緩決人等候審人等及虧空官銀監追人等八旗各於該處將入官房屋修築高牆分為三所重犯一處輕犯一處犯婦一處如此分別監禁既可減災病亦無擾亂等事包衣

佐領下人等亦照此施行宗室覺羅等於宗人府拘禁如此似為允當著管理旗務王大臣會同內務府總管將此事可否施行及如何修造高牆看守等處詳議具奏特諭

管理旗務王大臣會同內務府總管等議覆八旗獲罪人犯俱送刑部監禁既多疾病且甚繁擾實屬無益我

皇上廬念旗人

特命臣等將各旗官房修築高牆分為三所分別監禁
審慮所及至明至當裨益誠非淺鮮臣等欽遵

上諭議將八旗現審人犯及審明情實死罪人犯照常
在部監禁外其審結定罪及緩決候審虧空官銀監追
人等俱停其在部監禁八旗各將入官房屋量其足
用修築高牆分為三所重犯之房定為五間輕犯十
間犯婦三間其在內看守及造飯之房定為五間週
圍牆高一丈三尺牆頭布棘外共一門其在外該班

之房定為三間派該旗官兵看守滿洲蒙古漢軍三旗合派章京一員驍騎校一員領催二名馬甲十名為一班一日一換其驤黃旗者令正白旗看守正白旗者令鑲黃旗看守八旗悉照此例調換看守所需一應米糧煤炭等項俱照刑部之例由各部支取內三所看守巡查定為二十人分兩班更換嚴查其守門巡查之人於漢軍教養兵內挑取馬甲缺出即由其中挑取其供造飯等役於內務府咨取閒散人八

名分為兩班行走每旗選派六品以下官一員管理
派領催一名記檔每月三旗各派叅領一員當月稽
查凡一應事務令辦事官告知當月叅領具呈該旗
大臣等咨部存案罪人出入悉視刑部印文而行如
看守人等徇情將罪人閒放或有需索等事令該旗
叅奏從重治罪其看視罪犯之醫生著太醫院請

旨派出再衆犯之家屬亦照刑部例准於初二十六兩日
入看至上三旗包衣佐領下罪人除現在奉

旨交慎刑司枷號鎖禁之人照常在慎刑司監禁外其審
結定罪及候審監追欠項人等亦照八旗之例於

皇城外擇官房一所修造分別監禁其看守之人每一
班派包衣佐領下馬甲九名領催一名章京一員令
其看守在內三處巡查及造飯等役每一班由渾托
和下派閒散人十名其章京兵丁令其一日一換外
閒散人等分兩班行走此閒散人亦令看守之章京
管轄著慎刑司官員當月令其總理稽察所需米糧

煤炭等項亦照刑部之例由各部支取醫生亦由太醫院奏請派委重犯家屬亦照刑部例每月初二十六兩日准其入看

奏入於雍正五年十月十四日奉

旨依議

上諭王公大臣官員等朝服頂帶俱有定制但平時所用服色無有分別其應如何辨別品級之處著議政王大臣九卿會議具奏特諭

議政王大臣九卿等議覆典禮之昭垂等威宜辨冠裳之制度品級攸分我

國家法制精詳禮儀周備諸王及大小臣工朝冠朝服各照品級定為章程尊卑秩然惟朝會之外平時所用服色未辨品級茲奉

諭旨特令臣等會議具奏仰見我

皇上惇典庸禮辨明等威至詳至悉之盛心也臣等欽遵上諭議將平時所戴暖帽涼帽俱照朝帽頂分別令其戴

用凡親王世子郡王長子貝勒貝子入八分公俱用紅寶石頂凡未入八分公固倫額駙和碩公主額駙民公侯伯鎮國將軍和碩額駙及一品大臣俱用珊瑚頂凡輔國將軍奉國將軍多羅額駙二品三品大臣官員俱用起花珊瑚頂凡奉恩將軍固山額駙及四品官員俱用青金石頂凡五品六品官員俱用水晶石頂凡七品以下及進士舉人貢生俱用金頂凡生員監生俱用銀頂其候補候選者與現任同以上

臣等公同定議奏

聞俟

命下之日載入會典通行八旗直省一體遵行

奏八於雍正五年十月十八日奉

旨明年換涼帽時照此施行先製帽頂式樣進呈餘依議
欽此禮部衙門將製成帽頂式樣進

呈奉

旨著照此式王以下三品大臣以上各賞給一帽頂

上諭前鋒護軍內有馬上生疎者現今蘇魯克地方馬場內既有馬駒令伊等前往彼處計彼處馬場之數每場或令二三人分住於蘇魯克地方左近教以打圍既得嫻習騎馬又可將馬駒調馴將此著管理旗務王大臣等公同會議具奏特諭

管理旗務王大臣等議覆仰蒙

皇上念及八旗年少前鋒護軍未得在外行走是以馬上有生疎者著將伊等前往蘇魯克地方之馬場分

住學習騎馬打圍特降

諭旨至詳至備臣等查得張家口外上都達布孫諾洛達里剛愛此三處馬場俱有馬駒應擇八旗年少前鋒護軍內馬上生疎者派往臣等酌量八旗合派二百人值旗下馬匹出牧之時各騎本旗之馬前至鑲黃旗馬場令馬場總管將彼處馬匹迎接伊等騎至蘇魯克地方按三處馬場之數每場計令幾人居住學習騎馬俟旗下馬場將回之時仍將伊等送至馬場

令騎本旗之馬回京如此不數年間馬上生疎之年
少前鋒護軍等俱得諳練騎馬行圍之道而馬場之
馬駒亦得調馴矣具奏奉

旨爾等此議是今年停其派往俟馬場總管來時向伊問
明應著前鋒護軍幾人前往馬場之處令其酌定於明
年再行遣往欽此臣等詢明馬場總管五十四議得將
八旗前鋒護軍以明年為始著左右兩翼前鋒統領
八旗護軍統領等令其兩翼合派前鋒護軍二百名

每翼派前鋒校一員每旗派護軍校一員此所派之
前鋒校護軍校俱算於本旗前鋒護軍數內一同前
往亦照出牧之例每人一日給銀一錢俟至蘇魯克
地方交與總管五十四令其管轄酌量所有之騾馬
羣十八處每處分住幾人令騎馬駒學習打圍伊等
來往俱令派往出牧之副都統等於沿路管束不許
勞苦馬匹

奏入於雍正五年十一月二十二日奉

旨好

內務府總管等奉

上諭紫禁城內看守之護軍馬甲等每日衝冒寒冷該班行走欲加恩給與飯食一年需銀若干應動用何項銀兩東西兩邊另給房屋為造飯供食之所及令何等人員管理之處爾等詳議具奏特諭

內務府總管等議覆

紫禁城護軍馬甲應行看守者共六十七處每日進

班者共六百九十七人今

皇上特沛隆恩命議給飯食此內護軍叅領官員等應照奏蒙古事之侍衛例護軍校護軍筆帖式等應照執事人之例其所需食物等項折給銀兩於

紫禁城內東西兩邊近城之處撥給房屋以為造飯供食之所管理造飯等事相應令內管領等兼管應用銀兩行文戶部支領於歲底將用過數目銷算具奏奏入於雍正五年十一月二十八日奉

旨於明年正月初一日為始推恩給與飯食著動用廣儲司銀兩餘依議

上諭近見乾清門外人甚繁雜諸王及旗下大臣部院大臣內務府總管等俱因在內辦事伊等跟隨之人竝無限制以致人數衆多捏造言語各處傳播大臣等俱各給有辦事房屋即在門外不甚相遠將此著怡親王康親王領侍衛內大臣前鋒統領護軍統領等公同查例議奏特諭

和碩怡親王允祥等議覆臣等查定例凡進

內禁門親王以下貝勒以上准帶一人貝子以下至大臣等俱不准帶人嗣後親王以下宗室公以上如進內禁門俱准帶護衛一員其部院大臣等准帶筆帖式一人旗下大臣等准帶驍騎校或印房筆帖式一人隨入再

景運門隆宗門後右門係

乾清門侍衛執事人等給與職名出入之所相應仍照

舊例遵行外其在

內行走之王等亦令得在

隆宗門出入其餘俱令於後左門出入可也

奏入於雍正五年十二月初一日奉

旨爾等所議太過朕因乾清門外人甚繁雜故行降旨王大臣等着照常在各門行走爾等所議內有令驍騎校跟隨大臣之語驍騎校係辦事之人不可令跟隨大臣及以私事差遣或印房筆帖式或領催令其跟隨餘依

議

上諭昨因安圖犯法查其家產知伊藏埋之銀甚多又張文彬家埋藏萬餘金被其義子偷竊此皆近日之事夫天地生財原以濟生民之用貴乎流通於宇宙之間故出之於此得之於彼流通轉移各受其益此即裒多益寡酌盈劑虛之道也乃愚昧無知之人不明此義惟恐積之不固秘之不深或以萬計或以數十萬計埋藏地中多方掩蓋其始不欲令人知之則其所以藏之者甚

密迨歲月久遠更無有知之者而此銀遂至迷失是錙銖而積之什襲而藏之者竟歸於烏有亦惑之甚者矣或有時被他人掘去旁觀忤妬每致紛爭角訟因而受累招尤豈非埋藏者實貽之害乎況地中多藏一金民間即少一金之用不可以不察也似此等藏銀者大抵皆愚昧無知之流向來既未曾禁止又無人明白開導是以迷而不悟自謂得計而不知其非朕為愛養生民計欲使財寶流通彼此得其利濟其在鄉村之間慮有

盜竊之患或以金銀藏於牆壁及土炕之中尚在顯淺之處不至迷失若深藏於地中將來歲月既久子孫亦不知踪跡棄置土壤深屬可惜其作何曉諭勸戒禁止之處著九卿會議具奏再提督衙門拏獲石富村三家店二處偷掘明代舊墳之人竊去金銀珠寶甚多掘墳之人已按律治罪夫以金銀殉葬尤屬愚昧之極毫無益於死者而徒起小人覬覦之心百餘年後尚不免偷掘之事此其於理不順於事非宜更不待智者而後知

也滿洲從無以金銀殉葬者漢人則間有之今石富村等處近事若此深可為戒竝將此通行曉諭勸導俾此後官民人等勿為此無益有害之事特諭

九卿等議覆天地生財原以濟生民之用故必使其流通轉移始能有無相濟乃愚昧無知之人不識此義將金銀深埋地中以為子孫久遠之計迨歲月既久以致子孫亦不知踪跡或被他人掘出互相爭告因此罹罪者往往有之則是以有用之財反為害人

之物我

皇上睿慮周詳仁恩溥被

特命臣等會議出示禁止臣等欽遵

上諭行文八旗及直省督撫令其轉交該地方官於城市
村莊出示曉諭倘不遵行仍有將金銀埋藏地中者
一經發覺將埋藏之金銀散給地方貧民若被他人
偷掘已經拏獲者將金銀追出不給本主亦令散給
地方貧民再金銀殉塋原屬非理徒起小人覬覦之

心以致不免偷掘之患實為愚昧之極將此一併出示曉諭嚴行禁止俟

命下之日行文八旗及直隸各省督撫奉天順天府尹一體遵行

奏入於雍正五年十二月初五日奉

旨依議

上諭朕聞八旗護軍營之養廉銀兩副護軍叅領等不曾給與夫養廉銀兩乃特恩所賞者伊等既與叅領等一

同當差行走亦應量行賞給若已經分訖將來年如何給與之處著前鋒統領護軍統領等會議具奏特諭

前鋒統領護軍統領等議覆臣等欽遵

上諭查八旗副護軍叅領共一百一十二員請於前鋒統領護軍統領分內每分出銀四十兩前鋒叅領等每分出銀二十兩護軍叅領等每分出銀十兩前鋒侍衛等每分出銀十五兩共計銀二千二百四十兩給與八旗副護軍叅領每人各二十兩但本年已經分

訖相應自來年為始照此給與

奏入於雍正五年十二月初八日奉

旨依議

領侍衛內大臣公馬爾賽等將製造火器營所用聯
間帳房之處請

旨具奏奉

上諭爾等烏鎗營應用聯間帳房多少之處酌量議奏動
正項錢糧造給再子母礮係軍器中最緊要之利器今

每旗現有六位朕意以為尚少若再添設四位每旗湊成十位之處著管理火器營事務大臣等議奏特諭

管理火器營事務公馬爾賽等議覆查子母礮係軍器中最緊要之器械今每旗添設四位湊成十位除臣等火器營現有子母礮五十位外計八旗應添子母礮三十位及隨礮所用各項物件一併行知該部令其照數造給可也

奏入於雍正五年十二月二十五日奉

旨依議

世宗憲皇帝上諭旗務議覆卷五

欽定四庫全書

世宗憲皇帝上諭旗務議覆卷六

上諭聞得兵丁等於京通二倉支領米石時每因腳價之費賣米充用致有不善謀生之人並不計其米之接續輒以賤價糶賣及至缺乏又以貴價糶買此甚無益於兵丁者也現今旗下俱有官房或按八旗設立八局或按滿洲蒙古漢軍旗分設立二十四局將兵丁欲賣之米以時價買貯及其欲買則以平價賣給如此似於兵

丁大有裨益至於應派何等人員管理需銀若干萬兩
及所得利息作何利濟兵丁之處著管理旗務王大臣
等公同詳議具奏特諭

管理旗務王大臣等將八旗設立米局及派官管理
之處議奏奉

旨朕以八旗兵丁不善為生每至領米之後即賤價賣與
販米之人及至乏米又以貴價糴買徒令貿易之人得
利故特交管理旗務大臣等令將如何有益兵丁生計

之處詳悉議奏乃遲至兩三月之久始行具奏而所議之事又自始至末俱屬錯謬若爾等不曾以事為事徒應虛名未經留心猶可望爾等之悛改若謂已盡其心才識止此則朕不但深以為憂即夜寐亦不寧矣朕嘗降旨訓諭爾等凡事朕為爾等無不悉心籌畫爾等亦宜盡其所能仰答朕恩且此事俱係爾等職分內當辦之事朕如此指示交與爾等尚自漫不經心草率議奏果爾則國家事務欲誰辦理乎爾等內如有一二人盡

心詳議此事亦斷不至此此皆係穆森等久染俗習之人不以事為事互相推諉之所致爾等若不改此習仍然如此必將數人置之於法以為臣工之戒以正爾等之習此議甚屬錯謬著另議具奏將會議此事之大臣等所得養廉銀兩勒限兩月追回叅領係次大臣等辦事之人伊等雖未與議此事但大臣等思慮不到之處伊等理宜稟明乃並不經心視國事與已無涉亦殊可惡著將給過伊等之養廉銀兩亦行追回均勻賞給各

本旗之前鋒護軍等嗣後若大臣官員等仍不勉力行
走朕悉將此項銀兩賞賜兵丁欽此管理旗務王大臣
等尋議得伏惟

皇上廛念八旗兵丁不善謀生將所領米石賤價糶賣致
或不能接續又以貴價糶買

特命臣等詳議其宜均有裨益斯誠我

皇上愛養兵丁之至意也臣等請於八旗按滿洲蒙古漢
軍旗分設立二十四局通州按左右二翼設立二局

京師每局給銀五千兩通州每局給銀八千兩其八旗之二十四局於各旗官房內量其足用者揀用本旗若無官房將別旗官房就近揀用其通州米局於倉之附近處所有內務府官房揀擇二所應用八旗米局每局揀選賢能官二員領催四名令其辦理通州二局每翼委官四員領催八名辦理各局應用寫算之人於兵丁內擇其能者臣等酌量派委量米之人於旗人內僱用通州所有二局每翼揆旗各承查

一年設立米局以後將在他處私行糶賣者嚴行禁止每旗各派叅領一員令其稽查如有違禁買賣者從重治罪或被旁人拏獲將稽查之叅領及都統等一併議處領米之時著該旗派出之叅領驍騎校等將應賣之米賣於米局其管米局之官員等如有作弊侵漁之處令該管大臣等嚴查治罪若果生息有方於應陞處列名或該旗大臣等怠玩不以為事致有虧折者將所折銀兩著落派出之員賠補其有不

能完納者著落該管大臣賠補俟至一年將用過銀兩及所得利銀數目算明具奏所得利銀除各項費用外其餘銀兩作何利濟兵丁之處臣等另議具奏至此項銀兩從何處支領俟

命下之日臣等欽遵施行

奏入於雍正六年二月十三日奉

旨依議銀兩由戶部領取

鑲紅旗蒙古都統塞爾陳為補授

陵寢防禦帶領該處保題之觀音保引

見奉

上諭防禦一官並非世職與盛京

陵寢防禦不同盛京

陵寢防禦看守

陵寢居住年久所以有令伊子承襲者觀音保之父係由京城驍騎校補授前往之人乃照世襲之例題補於理不合著交八旗都統將何等官員補授承襲之處會議具

奏特諭

八旗都統等議覆查兵部檔案康熙二十一年奉

聖祖仁皇帝諭旨從前看守

陵寢及山海關各省城章京缺出俱令伊等子弟承襲後遂
停止此例俱由京城補授近因凱旋朕往謁

永陵

福陵

昭陵所過地方細加查看道路遙遠往返維艱若章京缺出

由京城補授搬移家口無力之員甚屬拮据且將前任章京之房地撤回給與新任之章京則前任章京之妻子無所倚靠不能回京欲在彼居住又無房產難以度日其艱難愈甚殊屬可憫嗣後看守盛京

陵寢及山海關等處章京缺出不必由京師補授著該管將軍將伊等子弟內揀選賢能者帶領引見承襲以免來往搬移之苦如伊等子弟內無可補授之人另行補授前往者則另給產業不必撤回前任章京之房產以為伊妻子

養贍之資著兵部等衙門會同詳議具奏欽此兵部等衙門議覆遵行在案今臣等議得看守

昭西陵

孝陵

孝東陵

景陵四處之防禦俱由京師補授前往不便與

盛京

永陵

福陵

昭陵之官員子弟一體世襲除將看守

盛京

陵寢之防禦員缺遵照康熙二十一年定例補授外看守

昭西陵

孝陵

孝東陵

景陵之防禦相距京師不遠且原無承襲之例請將伊等子

弟不必令其襲替嗣後此四處

陵寢防禦缺出該總管等於彼處人員內揀選應行補授之人並原官之子弟擬以正陪咨送來京該旗亦揀一員擬陪一併帶領引

見補授如無子弟亦無應補之人該總管將所出之缺行文該旗於京師人員內揀選一人擬正一人擬陪帶領引

見補授

奏入於雍正六年二月十七日奉

旨知道了

管理旗務王大臣吏部兵部大臣等奉

上諭旗人首重武藝即文員子弟亦不可棄而不學今鑲
白旗漢軍襲職家譜內開原任道員王希舜之子併伊
兄之子俱隨在伊任所夫有一人必需家人二三名以
供使令豢養許多家口如何能作清官不為私事所牽
累耶且伊等子弟隨往任所亦惟圖安樂倚仗伊父伯

叔聲勢妄行擾害地方習為不肖而已何得成就上進
今漢軍內不得可用之人日流而下者皆由於此若年
幼子弟理宜帶往任所其十八歲以上之子弟習武者
宜留在京師令其披甲習馬步射効力行走習文者當
令在官學讀書成就其材若將長成之子弟帶往任所
並不教以文學武藝任其安閒怠惰習為不肖即使捐
納得官亦一無用廢材有何益處嗣後凡旗人赴外任
者將帶往族人之處永行禁止有願將十八歲以上之

親子帶往者著將緣由呈明該都統具奏帶往再各省
驛丞典史等雜職於旗人不宜或係素有志量思竭忠
誠報効國家之人限於末員無由宣著反致遏抑或不
肖之徒規避旗差捐納雜職圖往外省其該管官以伊
係旗人故為寬容該旗大臣又因其外任不行查察兩
無管束伊得乘間久留在外甚屬無益可惜旗人徒致
廢棄著將文武雜職內幾品以上應用旗人幾品以下
應不用旗人之處議奏再漢軍旗下人丁衆多之佐領

累數百人有一生不得披甲者夫人丁繁衍衆多與其將無產業之人留在旗下並無用處都統等即應奏請或增編佐領或著於直隸營伍為綠旗兵丁即編入民籍在彼安置如何令其得所之處俱當詳悉議及將此交管理旗務王大臣等詳議再會同吏部兵部定議具奏特諭

管理旗務王大臣等會同吏部兵部議覆

皇上愛恤旗人如同赤子屢沛

恩施優渥周至以漢軍旗分外官子弟帶至任所致妨學業騷擾民人有累廉隅又以漢軍旗下戶口繁衍欲令咸各得所

特降諭旨洞徹周詳臣等欽遵

聖諭議得外任旗人無論大小文武官員永不准將族人帶往任所若係親子十八歲以上亦不准其帶往有情願帶往者聲明緣由具呈該旗大臣等請

旨具奏其未至十八歲年幼之子願帶往任所者稟明該

佐領叅領該旗大臣將年歲註冊准其帶往俟至十八歲時仍送回該旗至現任外官有帶往族人及十八歲以上子弟者俱行文撤回俟文到日該督撫量其路程遠近照例勒限著回京師習文者該旗送入官學讀書習武者挑選披甲執事人令其當差行走若另有情由願留任所者該督撫行文該旗請

旨具奏倘有違例帶往并隱瞞年歲留在任所不勒令回旗者或經該旗查出或被旁人出首將隱瞞官員不

行查出之該管官員交部一併治罪其滿洲蒙古旗分之外任官員亦照此例行再外省文武雜職品級卑微實不宜用旗人請將京城巡捕三營熱河等處千把總各部院雜職官員仍照常補用外其外省文職自縣丞以上武職自衛千總以上補用旗人其主簿典史巡檢驛丞倉庫大使千把總等雜職除係特旨補用外省千總外餘俱不准補用旗人其現任者照舊留任缺出裁削俟

命下之日交部求為定例遵行再從前漢軍旗下所有之
佐領各旗多寡不同因而當差行走不均仰蒙

皇上諭令均齊現今當差人等甚屬均平查中樞政考漢
軍佐領下五人內挑甲一名每佐領挑至四十名為
止以挑甲之數計之每人丁二百名編佐領一箇等
語今漢軍八旗之佐領共二百六十七分半各佐領
下所有人丁多寡不同或有閑散人丁自一百名至
三百名之多者亦有自十名至二十名之少者甚屬

不均現今八旗查送漢軍佐領之另戶分戶人數共
二萬八千九百二十九名計八旗均其數目每一佐
領得閑散人丁一百零八名現今每佐領所有馬
甲步甲執事人數七十餘名若合算均齊每一佐領
可得一百八十餘名不滿二百名人數不便添編佐
領現今漢軍閑散人丁有挑巡捕營馬步兵之例仍
照定例挑選此內隻身無產業人有情願入綠旗者
該旗大臣詳細查明數目將應送者具奏咨部轉送

直隸總督造入民籍挑為綠旗兵行走如此則佐領
內挑甲得人而閑散人等亦均沾

皇上洪恩矣

奏入於雍正六年二月二十八日奉

旨現任外官有伊等子弟在任所者不必調回其外省主
簿典史巡檢驛丞倉庫大使千把等雜職俱著回旗其
中若有該督撫提鎮等保留者行文該部准其留任著
該部行文該旗彙題餘依議

上諭凡革職留任及降級留任官員其陞轉開列及停扣俸祿之處自有定例但此等人員既留原任職掌班次一切照常其朝服頂帶亦應仍照本任品級准其穿戴以肅威儀著怡親王大學士九卿會議具奏特諭

怡親王大學士禮部等衙門議覆朝堂之冠服體統攸關百職之威儀觀瞻所係我朝建制立法禮儀周備凡文武大小臣工朝服朝冠各隨職掌班次俱已畫一遵守惟是革職留任官員不穿補服其降級留

任者止照降級服色今奉

諭旨准仍照本任品級穿戴令臣等會議具奏仰見我皇上優待臣工整肅朝儀之至意臣等伏思革職降級官員既蒙

特恩留任職掌班次一切照舊而惟朝服頂帶與職任不相符合則班聯未昭畫一請嗣後凡文武大小官員革職降級奉

旨留任者除陞轉開列及停扣俸祿之處俱照例遵行外

其朝服頂帶准其仍照本任品級穿戴庶班聯之內
威儀秩然體統昭而觀瞻肅矣俟

命下之日行文吏部兵部轉行八旗直隸各省文武衙門
永遠遵行

奏入於雍正六年四月十六日奉

旨依議

吏部因議處太常寺叅奏工部一案未經議及加級
紀錄抵銷自行檢舉奉

上諭凡有加級紀錄之官員准其抵銷降罰者所以勗勵
官常使之以功而補其過也今吏部議處工部一案將
尚書侍郎之有加級紀錄可以抵銷者竟未查明檔案
遽行議處甚屬疎忽若非朕降旨詰問竟致錯誤夫以
部院堂官朝列大臣而議處之時尚錯誤若此則各省
降罰之文武官員有可以抵銷者其被司官忽畧遺漏
或胥吏作奸高下其手以致屈抑不問可知矣嗣後部
中議處内外文武官員如八法軍政及定例不准抵銷

者著該部於本內聲明具奏其有加級紀錄例應抵銷而該部司官不行查明以致處分錯誤者若司官自行檢舉則將司官照例處分倘司官不行檢舉許被屈之員詳明該管上司咨部題叅將該司官嚴加議處如本員有受屈之處隱忍不肯詳明由他處查出者除不准抵銷外仍將該員議處如此則勸懲賞罰之例昭然畫一可以杜司官胥吏疎忽蒙混之弊其如何詳悉定例之處著吏兵二部議奏特諭

續於四月初七日奉

上諭官員等罰俸案件有紀錄者例准抵銷無紀錄者雖有加級不准抵銷但紀錄既可抵罰俸之案則所加之級亦可改為紀錄抵銷罰俸嗣後在京八旗武職官員於罰俸案件如有情願將議叙所加之級改為紀錄抵銷罰俸者准其改抵惟特恩賞加之級不准改抵特諭吏部兵部議覆臣等恭聆

聖諭仰見我

皇上體恤臣下鼓勵官常之至意查定例京察大計軍政
濫薦匪人越銜保題謊報開墾承造海船違例失察
曠犯隱匿偷曠及盜犯脫逃僉差不慎關廂失事限
滿不獲雖有加級薦紀俱不准抵銷又錢糧未完非
有軍功錢糧及

恩詔加級紀錄及武官降級戴罪圖功非有軍功薦紀俱
不准抵銷等語其餘降級罰俸俱准以加級紀錄抵
銷但從前議處内外文武各官臣部等部於不准抵

銷者雖援引定例並未將該員不准抵銷緣由於本
內聲明其例應抵銷而該司官忽畧遺漏不行檢舉
及受屈之員隱忍不行詳明者亦未定有處分之例
以致司官漫不經心遺漏錯誤或奸胥猾吏高下其
手希圖蒙混亦未可定請嗣後議處内外文武官員
凡定例所載不准抵銷者俱於本內將該員原有加
級紀錄與例載不准抵銷之處一併聲明其餘例應
抵銷者查明該員加級紀錄槩行抵銷又臣等欽遵

本年四月初七日

諭旨請將在京八旗武職官員如遇議處罰俸案件除

特恩加級不准改抵外有情願將議叙所加之級改為紀錄抵銷罰俸者俱准其改抵至降級留任之例原係虛降乃必俟三年無過開復不准以加級紀錄抵銷似屬未協嗣後凡係虛降之員除戴罪承追督催督運完納賠補賠修及限年承緝督緝等案必俟本案完結之日方准開復外其因公呈誤者查有加級紀

錄俱應准其抵銷又雍正三年九月二十三日奉

上諭嗣後降級留任官員遇有恩詔及議叙加級者俱准以加一級抵銷降一級至降級後捐納加級者不准抵銷前案欽此欽遵凡官員降級留任以後除捐納加級不准抵銷遇有

恩詔加級及議叙加級俱行抵銷倘被議之員有加級紀錄應行抵銷而該司官遺漏失於抵銷者自行查出檢舉應仍照定例罰俸兩個月如明知遺漏不自行

檢舉被該堂官查出或本員詳報上司咨叅者將該
司官照不行詳查例罰俸六箇月若司官遺漏抵銷
而本員明知受屈隱忍不行詳明被科道糾叅或該
管上司查明咨叅者將本員加級紀錄不准於本案
抵銷仍照議處司官之例處分如此則各官咸知儆
惕而處分不致有疎忽遺漏之虞矣請以奉

旨之日為始載入例冊通行直隸各省督撫提鎮一體遵
奉施行

奏入於雍正六年五月初八日奉

旨依議

上諭護軍吳正額於三月初三日毆斃人命比時即應行文提督捕緝今經十日該旗始具奏行文怠玩已極魏臘著交部察議仍令開具逸犯形貌行文直隸總督及提督衙門嚴行盤緝務獲嗣後凡係奉旨捕緝人犯及此等毆斃人命或關繫要案人犯內如有脫逃著即行文八旗並提督衙門及五城察院令各竭力緝獲併諭

直隸總督行文附近京畿之涿州良鄉通州昌平河間等處州縣官員將緝捕人等派定預備倘各旗有應捕人犯部文到日即行捕緝一面申報該督若有應捕人犯俟行文總督而總督轉行屬員耽延時日必至有誤著即行文刑部都察院一面轉行附近州縣嚴行盤緝其獲犯藏匿何地及容隱情由一經審出該旗及地方各官作何處分其緝獲之大臣官員作何議叙之處該部議奏特諭

兵部等衙門議覆緝捕人犯務期迅速始能拏獲如有逃逸必嚴行盤緝始不致遠颺向來附近京畿之涿州良鄉通州昌平河間等處州縣衙門雖設有捕役但未有專司難免承緝不力且應緝人犯行文直督轉行所屬州縣又致需滯時日應行令直督轉飭附近京畿之涿州等處州縣官員每處揀選幹役四名專管緝捕之事嗣後凡係奉

旨捕緝人犯及毆斃人命并關繫要案人犯該管衙門即

行文八旗步軍統領及五城察院轉行所屬地方嚴
行緝拏并牌行附近京畿之涿州等處一體盤緝該
州縣即令捕役嚴行查訪另行申報總督再在京人
犯脫逃經管應捕地方文武各官俱照城內失事例
住俸勒限一年緝拏如限內不獲俱降一級調用仍
令接管官照案緝拏如一月之內有能拏獲者免其
議處若非經管之文武各官并該管上司大臣有能
將奉

旨捕緝人犯及毆斃人命并關係要案之人犯於一月之內拏獲者拏獲一名紀錄二次於一月之外拏獲者拏獲一名紀錄一次其緝獲之捕役令該管地方官分別賞給以示獎勵若遇此等人犯行文到日地方各官不即行捕緝者或經告發或被糾叅將地方官照不能察緝奸民例降二級調用如拏獲之犯審出在何地藏匿不知情者將該旗佐領驍騎校并地方官照兇犯不知情不行查出例降一級留任如係知

情容隱者將該旗佐領驍騎校并地方官照諱盜不
報例革職該管叅領上司降二級調用如此嚴定賞
罰捕緝必勤一應緊要人犯自不致於逃匿矣俟

命下之日載入例冊通行八旗步軍統領都察院大宛二
縣直隸各省一體遵行

奏入於雍正六年六月初五日奉

旨依議

正白旗漢軍都統李國權將侵用入官銀兩之佐領

王義叅劾具奏奉

上諭八旗乃各省之表率所關甚為重要其叅領佐領驍
騎校領催內之不肖者至將關係正項錢糧公處存貯
之銀及催追交庫銀兩往往侵蝕入已蔑視法紀是何
道理此等銀兩皆係伊等承辦之事乃敢自行偷用情
殊可惡在伊等之意必以事不發覺則可肥已即或敗
露罪不至傷身命是以毫無畏懼而為之耳前於滿洲
致死滿洲之案另定法律克惡之人俱知警戒似此侵

盜在官銀兩之人亦不可不另定法律相應如何定罪之處著管理旗務王大臣公同詳議具奏再定法後曉諭八旗或自今年某月奉行或自明年奉行之處一併議奏特諭

管理旗務王大臣等議覆凡旗下在官交官銀兩該叅領佐領驍騎校領催等俱有承管承追之責乃敢自行侵用不法實甚若不嚴定法律則不肖匪類莫知戒懼惡習何由悛改嗣後凡一應應交官銀兩關

係錢糧公貯銀兩若侵蝕三百兩以上者即處斬侵蝕一百兩以上者即絞侵蝕四十兩以上者枷號三個月鞭一百發黑龍江侵蝕十兩以上者枷號三個月鞭一百侵蝕十兩以下者枷號兩個月鞭八十侵蝕銀兩著落犯人家產嚴查變價勒限半年全完逾限不完者將家產照例入官若無家產不能賠補者將罪犯之妻子入辛者庫至侵蝕銀兩而該管官不行查出者將都統副都統降二級罰俸二年將不能

管束又不能查出之上司官員革職其罪犯應賠銀
兩若不能全完即著落大臣等賠補如此庶不肖匪
類皆知畏懼不敢干犯法紀而該管大臣官員亦各
謹慎職守矣俟

命下之日載入律內通行曉諭八旗於本年九月起一體
遵行

奏入於雍正六年七月十一日奉

旨依議

鑲藍旗蒙古都統秦布將拏獲賭博一案具奏奉

上諭拏獲此等違禁之人及拏獲逃人者俱當獎賞爾等旗
下拏獲賭博之時移取刑部刑具在爾各該旗衙門將伊等
賭具紙牌係從何人購買根由審訊若供出賣牌之人爾等毋
以所供為實輕率捉拏倘伊不將賣賣之人供出誣賴素有仇
隙者則事至煩擾爾等另行詳細訪明賣牌情實再行拏審著
八旗王大臣會同內務府王大臣將拏獲逃人賭博偷賣賭具及
違禁之人量

其事之大小輕重作何分析等第獎賞之處詳悉議奏
特諭

管理旗務王大臣及管理內務府事務王大臣等議
覆該臣等議得嗣後凡拏獲奉部傳拏之人為首編
造謠言煽惑衆心之人銷毀制錢之人容留犯法之
人在家不行出首之人偷取官銀官物之人將拏獲
之兵賞銀二十兩官員紀錄一次

拏獲作紙牌骰子之人所賣之牌至一千張以上骰

子至五十個以上及職官賭博坐地虎光棍隱匿入官財物之人將拏獲之兵賞銀十兩拏獲二次者官員紀錄一次

拏獲從發遣處逃回之人殺牛賣肉之人僭越職銜放引馬之人兵丁閑散賭博之人當典軍器之人藏賣牌骰之人將拏獲之兵賞銀五兩

拏獲賣牛肉之人婚喪違禁過用之人違禁擅用黃銅之人頑鵠鶉鬪鷄蟋蟀賭錢之人民人旗奴賭博

將拏獲之兵賞銀三兩

拏獲逃人至五次者其原拏獲之兵賞銀三兩以上
各款之獎賞俱賞給為首拏獲之官兵其賞給官員
之紀錄著奏

聞由兵部照例賞給其賞給兵之銀兩著將各旗收貯之
公銀賞給其賞給銀兩數目於歲底入冊奏銷如有
不肖官兵借此詐賴好人或將犯法之人拏獲賄縱
等弊該管大臣嚴查叅奏將詐賴平人者照誣告例

治罪將犯法之人拏獲賄縱者照枉法受贓例治罪如各該大臣不將此等情弊查叅或被旁人告出或被巡查侍衛叅領御史等叅劾將該管大臣等罰俸一年奏入於雍正六年七月二十日奉

旨依議

上諭初九日城內徹夜放爆竹而兩翼之大臣不下百員竝無一人奏聞朕因降旨都統高其佩奏稱臣聞放爆竹欲傳本旗之兵柵欄不肯開放而臣處又未備有兵

丁竊思或有捕緝使令之事傳集兵丁如何方能速赴
無誤臣再三籌度茫無所見等語朕思八旗都統及所
管兵丁俱各分處如有緊急事倉猝之間傳集斷然不
能無誤朕欲嗣後八旗無論前鋒護軍馬甲內府佐領
下官兵有與某大臣同街居住者將附近居住之官員
兵丁即編給某大臣逐人寫一名牌為記令其收貯遇
有傳集之事官員兵丁各携名牌齊集編給之大臣處
呈遞若有無大臣居住之街著於護軍叅領或叅領內

立一街長照此編給再火班處附近居住之官員兵丁
即令齊集該火班之大臣處呈遞名牌聽其指示遵行
內府佐領之官兵亦照此編給有不將名牌呈遞者即
為違誤至九門雖有官兵看守俱在城內居住其城外
竝無看守之官兵城外亦甚緊要或於弔橋附近空閒
之處修造營房派兵數百名居住看守甚屬嚴緊有益
著議政王大臣管理旗務王大臣會同詳議具奏特諭
議政王大臣管理旗務王大臣等議覆嗣後八旗及

內府佐領之官兵不論旗分不論滿洲蒙古漢軍有
與某大臣同街居住者即編給某大臣逐人編寫名
牌至僻街小巷所居之官兵視與某街相近即編給
某街居住之大臣著編給之大臣街長分給名牌畫
押為記今其收貯其編給之數目著各大臣家記檔
備查夜間遇有傳集之事各將名牌呈與編給之大
臣若檔案有名之人不呈名牌者即為違誤其火班
處附近居住之官兵照此編給該火班之大臣內府

佐領之官兵亦照此編給如有無大臣居住之街於
前鋒護軍驍騎叅領內立一街長照此編給若無前
鋒叅領等官於武員內視其人去得者立一街長再
大臣等所編給人內或大臣或官員擇其人去得能
管轄者一人令為副街長若遇該大臣街長奉差他
往即令副街長承辦將此交八旗都統副都統等將
某街係某大臣某官員某旗之人或係兵丁居住之
處詳察各該旗街道繪圖合編備造清冊各旗存貯

徧諭所屬如編給之大臣街長內有外任陞轉降革
移居等故將編給官兵之名冊送至本地方之管旗
務大臣另行派人管理如官兵內有移居等故稟知
原編給之大臣削去名牌報明新移居處之大臣街
長編給管理如遇緝拏賊盜等事看守堆子之步兵
有所聞知即稟明章京報於該處之大臣若事有可
疑該處大臣差屬下人探聽的實酌量施行至看守
九門之滿洲兵丁俱在城門之內看守今城外添兵

看守甚屬有益除正陽門外有巡捕營官兵看守不
必令旗兵看守外崇文門等八門外於沿河空閒處
修造房屋各滿洲蒙古漢軍三旗派章京四員驍騎
校四員馬甲二百名挈家移住所派之章京四員該
旗帶領引

見揀選一員管總其馬甲著大臣等挑選於二十人內令
一人為長將旗下拴養之官馬每旗分出二匹給伊
等拴養以備巡查等事騎用至出場時將此馬入於

佐領下餵養數內其房屋章京八間驍騎校五間兵丁二間於城門附近修造堆子八間令官兵等輪替該班每班章京驍騎校共二員兵五十名其兵丁等不該班之日於附郭等處不時巡查賊盜與園居之匪類如有為盜作惡者報知該管官拏送本旗都統衙門處分仍著各旗都統副都統等派叅領等不時出城巡查如有虛報妄拏借端誣賴等弊將該兵丁送部嚴究重處其該管官指名題叅交部嚴加議處

若以該班不到等情題叅者仍照例治罪

奏入於雍正六年八月初四日奉

旨依議

上諭逃人狗兒沈國良既自行投回而該旗送部發遣部內即議以發遣均屬錯誤似此自行投回之逃人仍擬以發遣則在逃人等孰肯自行投回嗣後將逃人在外曾否為非并伊在逃月日次數之多寡應如何酌量分別治罪之處著刑部會同旗下大臣定例議奏特諭

刑部會同八旗大臣等議覆前將出逃自行投回之間散滿洲狗兒間散壯丁沈國良該旗送部發遣經部分別擬以發遣具奏仰蒙

皇上睿慮周詳立法務期明允

特頒諭旨令臣等將逃人在外曾否為非并伊逃走次數月日之多寡分別治罪之處詳議定例具奏查定例逃人初次逃走者左面刺字鞭一百二次逃走者右面刺字鞭一百三次逃人發往寧古塔烏拉給披甲

人為奴若另戶著當差內務府所管另戶人發遣打牲烏拉為打牲人又定例凡逃人逃走十日內拏獲者免刺字鞭一百不算逃走次數過十日者鞭刺另戶護軍兵丁及閒散人逃走者免刺字鞭一百又逃人自行投回者免其鞭刺等語除拏獲之逃人其初次及三次逃走者仍照定例遵行外其二次逃走拏獲者除右面刺字鞭一百外再加枷號一個月其自行投回之逃人有犯強竊盜案致死人命誘騙人口

等罪及在外為匪者雖自行投回刑部究審明白仍照本律科斷外自己酉年正月起凡另戶及旗下家人初次逃走一年以內投回者免罪至一年以外投回者鞭六十二次逃走若六個月內投回者免罪至六個月以外投回者鞭八十三次逃走若三個月內投回者免罪至三個月以外投回者鞭一百均免刺字三次後逃走是無改悔之念若仍不究治終無以止其逃走之心嗣後三次後仍復逃走者雖自行投

回即比照初次拏獲逃人例治罪若有竊騎馬騾持帶器械逃走者其投回時刑部審明雖無為匪之處無論年月多寡枷號兩個月鞭一百免刺其有經刑部發落之後復在該旗吃酒行兇者仍行送部發遣再該旗圈銷逃檔文內務將投回逃犯在外有無為匪及逃走次數月日多寡之處聲明咨部再定例以前逃走者應令八旗順天府直隸各省等處地方官遍行曉諭勒限一年之內或向地方官出首或自行

投回准其仍照舊例免罪倘一年之外始行首告者
照例分別治罪如此則法紀明允寬嚴得中而逃人
亦不敢久羈在外矣俟

命下之日通行八旗并各省將軍駐防處一體遵行

奏入於雍正六年八月初五日奉

旨依議

上諭致祭

陵寢派昇桌張之官兵係自何年派起每次需用官兵若干

著八旗都統等會同該部查明具奏特諭

管理旗務王大臣等議覆查祭

陵寢派昇桌張之官兵其始自何年之處歷年既久俱無檔
案可查至現今派昇桌張之官兵係禮部擬定桌張
數目交光祿寺預備兵部據光祿寺擬定昇桌官兵
之數轉行八旗派往查光祿寺檔案每次應用昇桌
之章京十三員領催二十三名馬甲三百六名臣等
將此咨查

陵寢處總管衙門據回稱

陵寢處所有禮部之執事人及馬甲在執事人處行走者於
昇桌張敷用竝不乏人等語請嗣後將由京城派官
兵前往之處應請停止

奏入於雍正六年十一月二十四日奉

旨依議

上諭大閱兵丁當鼓令前進時與其徒然聲喊而前莫如
人各攜帶髀頭或五枝或十枝射箭以進似壯軍容將


此著八旗都統前鋒統領護軍統領公同會議具奏特諭

八旗都統等議覆大閱兵丁當鼓噪前進時因其馬有馴劣之不同恐或不甚整齊是以未令射箭但馬步箭乃滿洲人之要務臣等欽遵

皇上指授操演兵丁於騎射之道俱可嫻習請嗣後每逢大閱鼓噪前進時令其射箭以進如此則操演有法而軍容益加整肅矣

奏入於雍正六年十二月二十日奉

旨著操演試看



世宗憲皇帝上諭旗務議覆卷六